



Sesida dals

Communitgà ils

Protocol nr.

10 da schaner 2023

11 da schaner 2023

15/2023

Dumonda da la fracziun da la PPS

concernent il deficit vertent en l'execuziun da la procedura d'inventarisaziun tenor la LNPGR: effects e consequenzas (emprim sutsegnader Metzger)

Resposta da la Regenza

Tar la dumonda 1: Per cumenzar stoi vegnir menziunà che 12 dals 18 inventaris d'edifizis consegnads definitivamain en il rom dal punct central da svilup (PS; 2017–2020) «Inventarisaziun bain cultural» han percurri correctamain la procedura tenor la Lescha chantunala davart la protecziun da la natira e da la patria (LNPGR; DG 496.000). Tar ils ulteriurs 6 inventaris d'edifizis (q.v.d. Fläsch, Jenaz, Poschiavo, Runtgaglia sco er tar las fracziuns communalas Maton e Donat) n'ha gì lieu nagina communicaziun persunala da las proprietarias e dals proprietaris dals bains immobiliars pertutgads en il rom da l'exposiziun publica incl. da la publicaziun en l'organ uffizial da publicaziun ed en il Fegl uffizial chantunal. Plinavant stoi vegnir menziunà ch'il team dal PS ha elavurà 13 ulteriurs inventaris d'edifizis. Quels stattan curt avant la terminaziun, èn dentant actualmain sistids pervia da la pausa pretendida en l'incumbensa Cramerì ch'è vegnida acceptada l'onn 2019. Dal rest èn gia vegnids elavurads 45 inventaris d'edifizis avant il 2017. Quests totalmain 58 inventaris d'edifizis n'han (anc) betg percurri cumplettamain la procedura prevista da la lescha – 11 da quests inventaris d'edifizis èn vegnids mess a disposiziun a las vischnancas sin lur dumonda per motivs d'ulteriurs process (p.ex. revisiun da la planisaziun locala resp. LPT1) sco «sboz» u «copia preliminar».

Tar la dumonda 2: Per realisar ils inventaris d'edifizis èn competentas las vischnancas. A Fläsch èn uschia ils objects integrads en l'inventari d'edifizis gia vegnids inscrits, cun in'exceptiun, cun vigur legala sin il plan general da furmaziun (PGF). La vischnanca da Jenaz n'ha fatg nagina revisiun da la planisaziun locala dapi la consegna da l'inventari d'edifizis. A Runtgaglia è la revisiun da la planisaziun locala actualmain en la procedura d'approvaziun. Las trais chasas d'abitar ed il bigl da l'inventari d'edifizis figureschan en il PGF ch'è vegnì sutmess per l'approvaziun. Las chasas d'abitar èn vegnidas taxadas sco edificis degns da mantegniment resp. sco edificis remartgabels ed il bigl sco object cultural protegì. A Poschiavo è vegnida

fatga l'examinaziun preliminar da la revisiun da la planisaziun locala. L'inventari d'edifizis ha servì en quest connex sco basa. I han gì lieu occurrenzas d'infurmaziun publicas (uschia er davart l'inventari d'edifizis). La Tgira da monuments stat en stretg contact cun la vischnanca. Las vischnancas precedentas Maton e Donat tutgan da nov a la vischnanca fusiunada Muntogna da Schons. Perquai ston ils inventaris d'edifizis correspundents vegnir revocads e vegnir revedids totalmain per la nova vischnanca.

Tar la dumonda 3.1: Gea. Uschespert che la revisiun parziala da la LNPGR concludida en la sessiun d'october 2022 è entrada en vigur (probablmain 1. mesadad dal 2023) ed uschespert ch'er la sistida da l'inventarisaziun po pia vegnir abolida, vegn la Tgira da monuments ad adattar successivamain tut ils inventaris d'edifizis sin fundament da la nova basa legala. La prioritad vegn ad esser tar ils inventaris manglus, e quai cunzunt suenter avair consultà las vischnancas pertutgadas. Quant svelt che questas lavurs vegnan fatgas, dependa en spezial da las resursas disponiblas. A partir da l'onn 2023 stattan a disposiziun a la Tgira da monuments totalmain 120 pertschients da plazzas per l'inventarisaziun. Da quels vegnan dentant 80 pertschients da plazzas duvrads per elavurar inventaris d'edifizis. Cun auters plets po l'inventarisaziun sco tala puspè vegnir premda per mauns cun mo 40 pertschient da plazzas. Sco consequenza vegn l'inventarisaziun futura correspondentamain continuada plaunsieu. La revisiun svelta dals inventaris d'edifizis manglus vegn dentant premda en mira.

Tar la dumonda 3.2: Directamain na datti naginas consequenzas, perquai che l'urden fundamental communal vegn fatg en il rom da la Lescha federala davart la planisaziun dal territori e betg da la LNPGR. Cun la proxima revisiun da la planisaziun locala sto mintgamai l'inventari d'edifizis il pli actual e definitiv vegnir resguardà sco basa. I resta dentant da remartgar che las vischnancas dovran er gugent ils sbozs sco basa.

Tar la dumonda 3.3: I resultan mo quels custs che avessan tuttina stuì vegnir surpigliads en il rom da la revisiun prevista dals inventaris resp. da l'adattaziun pervia da las novas basas a partir da l'onn 2023.



En num da la Regenza

Il president:

Peter Peyer

Il chancelier:

Daniel Spadin